

কুশল পাহাড়ি

(গল্পগ্রন্থ - কুশল পাহাড়ি)

ভাদ্রের শেষে মনোহরপুর বেড়াতে গিয়েছিলুম সেবার। কাছেই অরণ্যময় সুন্দরগড় স্টেট। মনোহরপুর স্থানটা চারিধারে শৈলাচলে ঘেরা। বেড়াতে এসেছিলুম দুদিনের জন্যে, এখানে থাকবো ঠিক করেছিলুম ডাকবাংলোয়। কিন্তু আলাপ হয়ে গেলস্থানীয় এক বাঙালি ভদ্রলোকের সঙ্গে। তিনি নিয়ে গেলেন তাঁর বাসায়, ছাড়লেন না কিছুতেই।

আমি বললাম—আপনার অসুবিধে হবে। হয়তো বেশিদিন থাকবো।

তিনি মৃদু হেসে স্বস্তির নিশ্বাস ফেলে বললেন—আঃবাঁচলুম। দুমাসের বেশিও কি থাকবেন ?

—না।

—থাকুন না।

—না।

—তবে কেন ‘কিন্তু’ করছেন ? প্রবাসে বাঙালির বন্ধুবাঙালি। স্বদেশে তা নয়। জানেন তো সঞ্জীববাবুর উক্তি ? যতদিন ইচ্ছে থাকুন। নিজের বাড়ি মনে ভাববেন।

মনোহরপুর থেকে ন’ ক্রোশ দূরে কুশল পাহাড়ির ‘ভৈরব থান’—অর্থাৎ দেবতার ক্ষেত্র। একদিন মন্থবাবু বললেন—যাবেন সতীশবাবু একটা খুব ভালো জায়গায় ?

—কোথায়?

—ভালো একজন সাধু আছেন ওখানে। বড্ড জঙ্গল। রাস্তাও দুর্গম। গরুর গাড়িতে যেতে হবে।

—আমার সাধু-সন্নিসিতে দরকার নেই। জঙ্গল আছে তো?

—রাম জঙ্গল।

—তবে যাবো।

সুন্দরগড় আরণ্য-প্রকৃতির লীলানিকেতন। পথে পথেকরম গাছের ফুলের ঝরা পাপড়ি বিছানো। লম্বা-ঠোঁটধনেশ পাখি ও বনটিয়া ডালে ডালে বেড়াচ্ছে। কচিং কোনো পর্বতচূড়ায় প্রভাতের সোনালী রোদ এলাননা, কচিং কোনো পার্বত্য ঝরনার জলের ধারে লোহাজালি ফুল ফুটে পাথর ঢেকে ফেলেছে। পথেরও শেষ নেই, মুক্ত শৈলমালাবেষ্টিতভূমিশ্রীরও শেষ নেই, প্রান্তরেরও শেষ নেই। বনে বনেময়ূর, বনে বনে কোটরা, ভালুক, লেপার্ড।

গরুর গাড়ি চলেচে মস্তুর গতিতে। কখনো ঢালু পাহাড়িপথ উঠচে আমলকি গাছের ফলভারানত শাখাপ্রশাখার ছই ঘেঁষে। কখনো ফুলছড়ানো উপত্যকা বেয়ে নামচে জলভরানালার দিকে। কালীপাহাড়ির শৃঙ্গ ঠেলে উঠেচে ঘনবনের ওপরে ভিসুভিয়াসের মোচাকৃতি শিখরদেশের মতো।

সকালে গরুর গাড়ি ছাড়া হয়েছিল। সঙ্গে ছিল চিঁড়ে, চিনি, কলা, দই, পাকা পেঁপে, বাড়ির তৈরি ক্ষীরের সন্দেশ ও আচার। পথে যোগাড় করে নিলাম বড় বড় ডাঁসা আমলকি, পাকা বনডুমুর, কাঁচড়াদাম শাক। বর্ষার দিনে পথের এইসৌন্দর্যের তুলনা হয় না। সেদিন ভাবছিলুম আজ এ বন যেনশেষ না হয়। শেষ হলেই তো এ মায়া ফুরিয়ে যাবে। আবার পড়বে লোকালয়, তখনি শুরু হবে ব্ল্যাকমার্কেট, খবরেরকাগজ, হণ্ডায়-একদিন-ভাত খেও না উপদেশ, উদ্বাস্ত-সমস্যা। এই রকম মায়া জগতের মধ্যে দিয়ে যতদিন চলে চলুক গাড়ি।

বেলা বারোটা।

একটা কি বন্য নদীবনের ছায়ায় ছায়ায় ছোটো জলপ্রপাত তৈরি করে লাফাতে লাফাতে ছুটে চলেচে। বর্ষার উচ্ছল জলস্রোতে প্রাণবন্ত।

বললাম সঙ্গীকে—কি নদী মশাই ?

—কোয়েল নদীর শাখা।

—দক্ষিণ কোয়েল ?

—নিশ্চয়। এই নদীর জলে এক রকম পাথর পাওয়া যায়, বেশ সুন্দর রং। আপনাকে দেখাবো...মনে হবে হাইনিজ্জেড। আসুন, আগে একটা বড় পাথর আছে—তার ওপরবসে খাওয়া-দাওয়া করা যাবে।

—আপনি কতবার এসেছেন এদিকে ?

—ভৈরব থানের সাধুজির সঙ্গে দেখা করতে চারবার এসেছি। দেখবেন, তিনি সাধারণ সাধুনন। ভক্তি হবে আপনার।

—‘এমনকি আপনারও’ বলা উচিত ছিল বোধ হয়। আমার মতামত তো কাল শুনলেনই।

সেই প্রকাণ্ড পাথরখানাতে একটা শতরঞ্জি বিছিয়ে আমরাবসে পড়লুম। ক্ষুধার উদ্বেক হয়েছিল এ উক্তি আমাদের পেটের অবস্থার তুলনায় নিতান্ত অপ্রতুল ও অবাস্তব। ক্ষুধায় আমাদের পেটের ভেতরটা দাউ দাউ করে জ্বলছিল। এ দেশেরজলের গুণ আছে বটে। অগ্নিমান্দ্যে ভুগছিলাম গত একবছর, ক্ষুধাবোধ একেবারে ছিল না। বেশ পেটভরে চিঁড়ে, দই ও ফলখেয়ে ঝরনার নির্মল জল পান করে আবার গাড়ি ছেড়ে দিলাম। এবার অনেকটা পথ আমরা হেঁটে গেলাম—কেননা সব সময়গরুর গাড়িতে যাওয়া বড়ই কষ্টকর। ছায়ানিগ্ধ বনবীথিতেবন্যকুসুম ছড়িয়ে দিয়েচে ঠাণ্ডা বাতাসে, অলস হয়ে এসেছেমধ্যাহ্নটি, এই দীর্ঘ অবকাশমুখর নিভৃত, নির্জন, অরণ্য-পথে, কুঞ্জবনে শুধু পাখির মেলা, শুধুই সাদা মেঘের উড়ে যাওয়া মাথার ওপরকার নীল আকাশের মাঝখানে, শুধুই ঘুঘুর ডাকদূরে দূরে গাছপালার মগডালে। বর্ষার মেঘ ওঠেনি তাই রক্ষে।

একটা কথা আমার মনে হচ্ছিল। নাগরিক জীবন থেকেবছ দূরের এই সব বনপথ সম্পূর্ণ নিরাপদ। চুরি ডাকাতিএখানকার লোকেরা জানে না। সঙ্গী বললেন—এদের কাছেটাকার বাক্স রেখে যাবেন, চেনেন না চেনেন, এসে আবারনিয়ে যাবেন—আমি জানি।

রাস্তাঘাটে মেরে ধরে নেয় না ?রিভলবার নেই ?হাতবোমা নেই ?জিপ নেই ?

—ওসব শোনে নি কখনো এরা। চুরিই জানে না।

—চলে কি করে এদের ?চাষ তো তেমন দেখছি নে।

—বিরহোড় জাত এদিকে বেশি। তারা বনের গাছেশিমের লতা তুলে দ্যায়—যেখানে সেখানে। ওই শিমই তাদেরখাদ্য। আর পাখি, খরগোশ, গিরগিটি, সাপ সবই ওদের খাদ্য।অল্পে সন্তুষ্ট, খাটতে চায় না। মহুয়ার তাড়ি খেয়ে তিন দিন বঁদহয়ে রইল। টাকার মূল্য বোঝে খুব কমই।

একটি বিরহোড় পরিবারের পর্ণকুটির পড়লো পথেরপাশে বনের আড়ালে। পুরুষ নেই। মেয়েরা উদূখলে চিঁড়ে কুট্চে। সুন্দর, সুঠাম দেহভঙ্গি, অটুট স্বাস্থ্য উপচে পড়ছেসারা শরীর বেয়ে। মুখের হাসি পবিত্র, সলজ্জ। ওদের ঘরেরকাছে অন্য কোনো ঘর নেই—আছে দূরে দূরে। কোনোবাঙালির মেয়ে এই নিবিড় বনের মধ্যে এমনধারা পর্ণকুটিরেএকা ছেলেপুলে নিয়ে থাকতে পারবেন না একদিনও। তাঁদেরসভ্যতাদুর্বল মন বাঘ ভালুক ভূতের ভয়ে আড়ষ্ট হয়ে যাবেএকদিনে। হাতেপায়ে খিল লাগবে।

সভ্যতা আমাদের শরীর ও মন নিস্তেজ করে দিয়েচে, এ কথার সত্যতা শহরে থেকে তত উপলব্ধি করা যাবে না।এক ট্রামস্টপ থেকে অন্য ট্রামস্টপ পর্যন্ত যেতে হলে যেখানে লোকে ট্রামে ওঠে, সেখানে থেকে বুঝতে পারা যাবে না মুক্তআরণ্য জীবনের সাহস, শক্তি, তেজ কষ্ট-সহিষ্ণুতা। ভালোকরে বুঝলাম সেটা আজ।

অস্তদিগন্ত পাটল বর্ণের রঙে আকাশ রাঙিয়েচে, বনতরুর শীর্ষে শীর্ষে রাঙা আলো, লতার দুলুনি ঝোপেঝোপে—এমন সময় ভৈরব থানে আমরা পৌঁছে গেলাম।সাথী বললেন—সঙ্গে মশারি আছে আমাদের ?

—নেই।

—তবে ?

—মশা খুব ?

—মনে হচ্ছে এখানে মশা আছে।

—চীনে ধূপ দু-একটা সুটকেসে আছে, জ্বালানো এখন। থাকবো কোথায় ?

—একটাঘর আছে সেখানে কেউ থাকেনা। গাড়োয়ানকে দিয়ে বাঁট দিয়ে পরিষ্কার করিয়ে নেবো। রান্না করা যাবে রাত্রে।

—খুব ভালো। এ তো এক রকমের পিকনিক। এখন মনেহচ্ছে মেয়েদের নিয়ে এলে খুব আমোদ হত।

—সামনের পূর্ণিমায় মেলা হবে এখানে। কলকাতা থেকে মা-লক্ষ্মীকে নিয়ে আসুন সে সময়ে, চমৎকার হবে।

—সাধুজীর সঙ্গে দেখা হবে না এখন ?

—নিশ্চয়ই হবে। চলুন, ডেরা ঠিক করে নিয়ে তারপরওখানে যাওয়া যাবে।

বাসা ঠিক হয়ে গেল তখন। বেশি পরিষ্কার করতে হল না—কিন্তু ঘরের মেঝেতে গোটাকতক গর্ত দেখে মেজাজ খারাপ হয়ে গেল। এই বর্ষাকালে গর্ত যেখানে থাকে, সেখানে বিষাক্ত সর্পের আড্ডা। কি করা যায় ? আমার সঙ্গী বললেন, অত ভয় পাবেন না। রান্না তো শেষ করি আগে।

মঙ্গলটুডুবলে একজন সাঁওতালের সঙ্গে কাঠেরকথা বলতে সে কাঠ এনে দিতে রাজী হল। চার পয়সা মাত্র চুক্তি—আমাদের রান্নার সব কাঠ এনে দেবে। সে-ই বললে—কোন ঘরে রান্না করচিস তুরা ?

—নাটমন্দিরে।

—কেনে রে ? ওটায় যাসনি। ঘাটোয়ালী বাংলায় যা, তাদের জন্যেই তো সাহেবের বাংলা খোলা থাকে। নিয়েযাবো চল সেখানে।

মঙ্গল টুডু আমাদের কাঠ ও জল এনে দিয়ে রান্নার সাহায্য করলে। ঘাটোয়ালী বাংলায় আমরা গেলাম রান্না খাওয়ারপরে। তখন সন্দের হওয়ার পর ঘণ্টা-দুই কেটে গিয়েছিল।

ঘাটোয়ালী বাংলাটি খড়ের ঘর বটে কিন্তু সিমেন্টেরমেঝে, চেয়ার টেবিল খাটিয়া সব সাজানো আছে, এমন কি জানলায় দরজায় পর্দা পর্যন্ত। শিমুল শালের ঘাটোয়ালী জমিদার গবর্নমেন্ট বন বিভাগের উচ্চপদস্থ কর্মচারীদের বাসের জন্য এই বাংলাঘর করে দিয়েছেন এবং তাঁর খরচে এটার মেরামত, পরিষ্কার ইত্যাদি চালু রেখেছেন দয়া করে নয়, ঘাটোয়ালী আইন-অনুসারে বাধ্য হয়ে। আমরা গবর্নমেন্টেরকর্মচারি নই বটে কিন্তু বাঙালি ভদ্রলোক—সুতরাং সাত-খুনমাপ। চৌকিদার তখন সেলাম বাজিয়ে ঘর খুলে দিলে।

এইবার সাধুজীর সঙ্গে দেখা করতে যাবার জন্যে আমরা বেরললাম। মঙ্গল টুডুআমাদের সঙ্গে ছিল, সে আমাদের জানালে, সাধু খুব বড়। মৌন থাকেন দিনে। রাত্রে কথা বলেন।

সাধু দেখে বিস্মিত হলাম। প্রায় সত্তরের কাছাকাছি বয়স হবে, আবক্ষ বিলম্বিত শ্বেতশশ্রু, গলায় তুলসীর মালা, হুস্তপুস্ত নাদুস-নুদুস দেহ, পিত্তস্নেহভরা শান্ত বড় বড় চোখদুটি। বাঙালি সাধু, মানভূম জেলায় বাড়ি ছিল। সতেরো বছর বয়স থেকে উদাসী, গৃহত্যাগী। সব খোলাখুলি বললেন আমাদের কাছে। সাধুসুলভ গর্বের অস্পষ্টতা নেই তাঁর।

সাধুজী বসে ছিলেন একটা সুপ্রাচীন বিশাল শালতরুরগুঁড়ি ঘেঁষে খুব বড় ও চওড়া একখানা মসৃণ শিলাখণ্ডের ওপর। শুক্লা নবমী তিথির জ্যোৎস্না ডালপালার ফাঁকে ওঁরআসনে এসে পড়েছে। কুশল পাহাড়ির শৈলশ্রেণী ভৈরবখানকে চারিদিকে ঘিরেছে। বহু পুরাতন পাথরের চাঁই। সব যেন এখানে সুপ্রাচীন—প্রাচীন সাধু, প্রাচীন শালবৃক্ষ, প্রাচীনশিলাসন, প্রাচীন অরণ্যভূমি। মনে হল এ পরিবেশ ছেড়ে আর কোথাও যাচ্চিনে। থেকে

যাই এখানেই। ঋষি, সাধু, প্রবক্তাদের জ্যোতির্বাহিনী এখানেই, এ জিনিস আর কোথাও পাবো না—সুন্দরগড় রাজ্যের এই সুদূর বনভূমিতে যে বৃদ্ধ, পিতৃবৎস্নহশীল, ব্রহ্মজ্ঞ ঋষির পাদমূলে এসে আজ পৌঁছেছি, তিনিইমনে শান্তি এনে দেবেন। পথেঘাটে এ দুর্লভ জিনিসের সন্ধানমিলে না।

আরো মুগ্ধ হলাম যখন সাধুজী ঈশোপনিষদের একটাশ্লোক উচ্চারণ করে তার ব্যাখ্যা করতে লাগলেন। বার বার বলতে লাগলেন, “কবির্মনীষী পরিভূঃ স্বয়ম্ভুঃ” শ্লোকটিরমধ্যেকার ‘কবি’ কথাটার অর্থ-বৃদ্ধ। সাধুর মুখের সেই মধুরগম্ভীর বাণী আজও কানে বাজছে?

‘কবিই তিনি বটেন বাবা। এখানে বসে বসে দেখছি। এই শালগাছটাতে ফুল ফোটে, বর্ষাকালে পাহাড়ে ময়ূর ডাকে, ঝরনা দিয়ে জল বয়ে যায়, তখন ভাবি, কবিই বটে তিনি। আমি কিছু পাইনি বাবা। ভড়ং দেখচো, এ সব বাইরের। ভেতরের জ্ঞান কিছু হয়নি। তবে দেখতে চেয়েছি তাঁকে। তাঁর এই কবিরূপ দেখে ধন্য হয়েছি।”

এ সব বছর সাতেক আগেকার কথা।

আবার কলকাতা শহরে দুবেলা নিয়মিত অফিস করছি। অর্থের সচ্ছলতা এমন নেই যে যখন তখন বা প্রতিবৎসর বেরিয়ে যাবো বেড়াতে। সেদিন একটা পার্টিতে গিয়েছিলাম। বড়লোকের বাড়ির পার্টি। অনেক বড়লোকের আনাগোনা দেখলাম—ক্রাইস্‌লার হাঁকিয়ে, বুইক হাঁকিয়ে, মিনার্ভা হাঁকিয়ে। বেশ সুন্দর সব চেহারা, কেতাদুরস্ত সাজগোজ।

কিন্তু এত শিক্ষিত ও সম্ভ্রান্ত, অবস্থাপন্ন লোকেরসম্মেলনে সেদিন যা আশা করে গিয়েছিলুম তা পেলাম কই? শুধুই শুনলুম বৈষয়িক কথাবার্তা।

যেমন—

—দেওঘরের বাড়িটাতে এবার যাওয়া হল না। বড়ছেলের ইচ্ছে, আরো কিছু ফার্নিচার কিনে পাঠিয়ে দিলাম। কেউ গেল না গতবার, এবারও না। ওটা আর রাখবো না। আমার তো নিজের সময় নেই যাওয়ার। ছেলেরাও যেতে চায়না। বিষণলাল দালাল চল্লিশ হাজার দর দিয়েছিল মার্চ মাসে। আমার স্ত্রীর ইচ্ছে নয় বাড়ি বেচি। অথচ যাওয়াও হয় না। আপনার রিজেন্ট পার্কের জমিটাতে কিছু করলেন?

—হ্যাঁ, প্ল্যান স্যাংশন করতে দেওয়া হয়েছে। আশি হাজারের ওপর এস্টিমেট দিয়েচে বাগচি। ওরাই করবে। পি. ঘোষালের বাড়িটা তো বাগচি করলো—চমৎকার করেছে।

অথবা—

—ইলেকশনের আগে এই সবমজুর শ্রমিকের গোলমাল কেমন মনে করেন?

—ভালো না। সব জায়গায় চলচে। যে পার্টি মনে ভাবুন এদের সপক্ষে যাবে না, ইলেকশনের সময় তাদের মুশকিলে পড়তে হবে।

—সে তো বোঝাই যাচ্ছে। ইলেকশনের আগে দেশের মধ্যে বিরোধ, দলাদলির ফল এই দাঁড়াবে—

তারপর চললো বিশ্লেষণ। রাজনৈতিক তথ্যের বিশ্লেষণ।

সেই বৈদ্যুতিক আলোয় আলোকিত, সুবেশ, সুশিক্ষিত, ভদ্রজনসমাগমের মধ্যে বসে আমার মনে আসছিল কুশল পাহাড়ির সেই প্রাচীন সাধুর কথা। তাঁর সেই সুন্দর সরলবাণী, নির্জন বনানী ঘেরা বটতলাটিতে যা সে-রাত্রি উচ্চারিত হয়েছিল, এখানে বসে আবার তারই স্মৃতি জেগে উঠলো অতীত দিনের দ্রুত, আধো-ভোলা, আধো মনে-পড়া কোনো মধুর গানের একটি চরণের মতো।

আর একটি কথা তিনি বলেছিলেন।

কি অদ্ভুত লাগছিল সেটা সেই ভরা ভাদরের বেতসকুঞ্জ ও শালবীথির পরিবেষ্টনীতে। মস্ত বড় কটি বাণী।

বলেছিলেন তিনি :

—মুক্তির ধারণাবন্ধন আছে বলেই আসে। যথার্থ বিচারের দৃষ্টিতে মানুষের মুক্তিও নেই বন্ধনও নেই। ব্রহ্ম এক অচিনরাজ্য, যে যেখানে যায়, সেই বোঝে ব্রহ্ম দ্বৈতও নয় অদ্বৈতও নয়। তিনি শাস্ত্রেরও পারে, বাদানুবাদেরও পারে, দ্বৈতবাদের প্রতিপাদ্য নয়, অদ্বৈতবাদেরও প্রাপ্য নয় ! অনুভূতিই একমাত্র জিনিস। মানুষ মুক্ত আছেই, কেবল সে সম্বন্ধে সচেতন নয়সে। মানুষ সদামুক্ত, সে মানুষ। কিছু পড়তে হবে না। কিছুসাধনা করতে হবে না। অনুভূতিই উত্তরায়ণের সেই অভিযাত্রী, যা তাকে পলকে মুক্তির জ্যোতিরলোকে নিয়ে গিয়ে তুলতেপারে। বিশ্বাস কর বাবা, মানুষ মুক্ত। সে-ই নিজেকে নিজে বেঁধেছে। সেই অনুভব করুক সে মুক্ত! সে মানুষ, সে মুক্ত।